

Newspaper	Harakah
Date	4/1/2013

## Taktik licik Mahathir di sebalik pengharaman Umno

Harakah - 4/1/2013

**KOTA KINABALU:** Mantan Perdana Menteri, Tun Dr Mahathir Mohamad berjaya menguasai sepenuhnya Umno apabila bertindak mengharamkannya pada tahun 1988.

Bekas Timbalan Menteri Persekutuan, Dato' Yahya Lampung berkata, Dr Mahathir sanggup mengambil tindakan sedemikian asalkan beliau dapat mengawal Umno sepenuhnya tanpa memperlihatkan agenda awal penubuhan Umno kepada orang Melayu.

"Kita melihat pada tahun 1988 apabila Umno diharamkan tetapi jawatan Presiden tidak diharamkan dan inilah dilakukan oleh Dr Mahathir.

"Kalau kita mengikut kepada asas jika sebuah parti itu diharamkan sudah pasti jawatan presiden juga turut haram tetapi itu tidak berlaku bila Umno diharamkan," jelas beliau yang merupakan Bekas Ketua Umno Tanjung Aru.

Umno yang diharamkan pada tahun 1988 apabila 11 cawangan Umno yang tidak berdaftar telah menyertai perwakilan dan pada ketika itu Ahli Parlimen Gua Musang, Tengku Razaleigh Hamzah (Ku Li) bertindak bertanding jawatan Presiden Umno.

Ku Li yang tidak berpuas hati telah membawa perkara tersebut ke mahkamah dan bekas Ketua Hakim Negara Tun Salleh Abbas dipecat supaya kes tersebut tidak dibicarakan dan membiarkan Umno diharamkan.

"Dr Mahathir yang juga memegang jawatan sebagai Pengerusi Barisan Nasional telah menyerahkan jawatan tersebut kepada Tun Dr Ling Liong Sik untuk sementara waktu.

"Setelah itu beliau telah menubuhkan Umno baru pada tahun 1988 dan Umno yang ditubuhkan pada tahun 1946 itu terus terkubur begitu sahaja dengan status haram," tambah beliau lagi.

Tambah beliau, Umno baru yang ditubuhkan pada tahun 1988 itu adalah milik Dr Mahathir dan beliau bertindak mengawal sepenuhnya pergerakan orang Melayu dan juga parti sehinggalah sebarang permasalahan di dalam Umno perlu dirujuk ke lembaga disiplin dan tidak boleh dibawa ke mahkamah, yang mana lembaga disiplin dikawal sepenuhnya oleh presiden parti.



Yahya Lampung

"Umno sekarang bukannya milik orang Melayu tetapi ia merupakan milik Dr Mahathir, ini perlu diketahui oleh semua ahli-ahlinya, Umno milik Melayu hanya pada nama tapi hakikatnya tidak.

"Dr Mahathir terus bertindak sebagai diktator dengan menguasai keseluruhan orang Melayu termasuk mereka dari parti komponen Barisan Nasional yang lain, ini terus terbukti sehingga sekarang walaupun Dato' Seri Najib Razak menjadi pengerusi tetapi segala perancangan masih dilakukan oleh Dr Mahathir," sambung beliau.

Yahya yang menekankan Umno pada tahun 1946 adalah milik orang Melayu tetapi Umno 1988 adalah milik Dr Mahathir ini dijelaskan apabila Tun Abdul Rahman, Tun Hussein Onn dan juga Ku Li tidak menyertai Umno yang ditubuhkan oleh Dr Mahathir setelah ia diharamkan.

**Dr Mahathir terus bertindak sebagai diktator dengan menguasai keseluruhan orang Melayu termasuk mereka dari parti komponen Barisan Nasional yang lain, ini terus terbukti sehingga sekarang walaupun Dato' Seri Najib Razak menjadi pengerusi tetapi segala perancangan masih dilakukan oleh Dr Mahathir.**